

# ԱՐՑԱԽԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

## ՈՐՈՇՈՒՄ

«11» մարտի 2022 թվական

N 252-Ա

ք.Ստեփանակերտ

### ԱՐՑԱԽԻ ՀԱՆՐԱՊԵՏՈՒԹՅՈՒՆՈՒՄ ՑԱՆՔԱՇՐՋԱՆԱՌՈՒԹՅԱՆ ԽԹԱՆՄԱՆ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ

Ղեկավարվելով Արցախի Հանրապետության Նախագահի 2017 թվականի սեպտեմբերի 25-ի ՆՀ-108-Ն հրամանագրով սահմանված կարգի 3-րդ կետով՝ Արցախի Հանրապետության կառավարությունը **ո ր ո շ ու մ է.**

1. Հաստատել Արցախի Հանրապետությունում ցանքաշրջանառության խթանման ծրագիրը (այսուհետ՝ Ծրագիր)՝ համաձայն հավելվածի:

2. Սույն որոշումն ուժի մեջ է մտնում հաստատման պահից, իսկ դրա գործողությունը տարածվում է 2022 թվականի հունվարի 1-ից ծագած հարաբերությունների վրա:

«Հաստատում եմ»

ԱՐՑԱԽԻ ՀԱՆՐԱՊԵՏՈՒԹՅԱՆ  
ՆԱԽԱԳԱՀ

Ա.ՀԱՐՈՒԹՅՈՒՆՅԱՆ

Հավելված  
Արցախի Հանրապետության կառավարության  
2022 թվականի մարտի 11-ի  
N 252-Ա որոշման

**ԱՐՑԱԽԻ ՀԱՆՐԱՊԵՏՈՒԹՅԱՆ  
ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅՈՒՆ**

**ԾՐԱԳԻՐ  
ԱՐՑԱԽԻ ՀԱՆՐԱՊԵՏՈՒԹՅՈՒՆՈՒՄ ՑԱՆՔԱՇՐՋԱՆԱԴՈՒԹՅԱՆ  
ԽԹԱՆՄԱՆ**

**ՍՏԵՓԱՆԱԿԵՐՏ 2022 ԹՎԱԿԱՆ**

## **ԲՈՎԱՆԴԱԿՈՒԹՅՈՒՆ**

- 1. ԾՐԱԳՐԻ ԿԱՐԵՎՈՐՈՒԹՅՈՒՆԸ**
- 2. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ**
- 3. ԾՐԱԳՐԻ ԻՐԱԿԱՆԱՑՄԱՆՆ ՈՒՂՂՎԱԾ ՄԻՋՈՑԱՌՈՒՄՆԵՐԸ**
- 4. ԾՐԱԳՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ**

## 1. ԾՐԱԳՐԻ ԿԱՐԵՎՈՐՈՒԹՅՈՒՆԸ

1. Դաշտավարության մեջ չափազանց կարևոր է ցանքաշրջանառության կիրառումը և ցանքատարածքների կառուցվածքի բարելավումը: Մեկ տեսակի կուլտուրայի տևական մշակությունը նույն դաշտում իջեցնում է բերքատվության մակարդակը: Դաշտավարության մեջ առանց մշակաբույսերի հերթափոխություն սահմանելու, հնարավոր չէ լուծել հողերի բերրիության ապահովման և կայուն բերքի ստացման խնդիրները:

2. Արցախի Հանրապետության կառավարության կողմից հողօգտագործողներին տրամադրվող պետական աջակցության շարունակական ծրագրերը նպաստում են տևականորեն չմշակված վարելահողերի շրջանառության մեջ ներգրավմանը, գյուղատնտեսական մշակաբույսերի ագրոտեխնիկական միջոցառումների բարելավմանը, ցանքատարածությունների և համախառն բերքի ավելացմանը, ինչպես նաև տնտեսական աճի ապահովմանը:

3. Ծրագրում օգտագործվող հիմնական հասկացություններն են՝

**1) դաշտավարություն՝** երկրագործության ճյուղ, որը գլխավորապես զբաղվում է պարենային, ինչպես նաև թելատու և կերային դաշտային բույսերի մշակությամբ:

**2) ցանքաշրջանառություն՝** գիտականորեն հիմնավորված, ժամանակի և միևնույն հողատարածության վրա գյուղատնտեսական մշակաբույսերի և ցեղերի հերթափոխություն:

**3) գարնանացան մշակաբույսեր՝** եգիպտացորեն, արևածաղիկ, կտավատ, հնդկացորեն, կորնգան, առվույտ, ոլոռ, սիսեռ, ոսպ:

**4) բանջարաբոստանային մշակաբույսեր՝** պոմիդոր, պղպեղ, սմբուկ, վարունգ, սոխ, սխտոր, կաղամբ, գազար, բազուկ, կարտոֆիլ, կանաչեղեն, ձմերուկ, սեխ, դդում, բամիա և լոբի:

4. Ծրագրով ներկայացվում են Արցախի Հանրապետությունում գարնանացան և բանջարաբոստանային մշակաբույսերի ու ծխախոտի մշակման տարածքների ավելացման խթանմանն ուղղված իրականացվելիք միջոցառումները և ակնկալվող արդյունքները:

## 2. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ

5. Գյուղատնտեսական որոշ մշակաբույսերի տեղական արտադրության ծավալներն ապահովում են ինքնաբավության ցածր մակարդակ և առաջնահերթ խնդիրը դրանց ցանքատարածությունների, արտադրության ծավալների ավելացումն ու ինքնաբավության մակարդակի հետագա բարձրացումն է, մասնավորապես, դա վերաբերում է գարնանացան և բանջարաբոստանային մշակաբույսերին, կերային խոտաբույսերին ու ծխախոտին:

6. Առաջնահերթ խնդիր է սեփական արտադրության հաշվին տեղական վերամշակող ընկերությունների կողմից մթերվող ծավալների ու արտադրվող արտադրանքի ավելացումը, անասնակերով ապահովվածության մակարդակի բարձրացումը, ինչպես նաև նոր աշխատատեղերի ստեղծումը, որը բխում է նաև Արցախի Հանրապետության գյուղատնտեսության ռեսուրսային ներուժի լիարժեք օգտագործման անհրաժեշտությունից:

7. Ցանքաշրջանառության մեջ ճիշտ ընտրված մշակաբույսերի մշակությունը բարելավում է հողի ֆիտոսանիտարական վիճակը, պաշտպանում է էրոզիայից, ավելացնում է օրգանական

նյութերի քանակը և բարելավում ֆիզիկական հատկությունները: Այդ առումով գարնանացան և բանջարաբոստանային մշակաբույսերի, կերային խոտաբույսերի և ծխախոտի մշակությունը կարևորվում է ցանքաշրջանառության լավագույն բաղադրիչ լինելու, պարենային որոշ մթերքների ինքնաբավության մակարդակի բարձրացման, անասնակերերի կայուն բազայի ստեղծման տեսանկյունից:

8. Ծրագրի նպատակներն ու խնդիրներն են՝

1) ապահովել վերամշակող ձեռնարկությունների համար անհրաժեշտ քանակությամբ հումք, այդ վերամշակող ձեռնարկությունների զարգացմամբ և քանակական աճով ապահովել դրանց կողմից օգտագործվող հումքի պահանջարկի բարձրացումը.

2) գարնանացան մշակաբույսերի բերքի ինքնաբավության մակարդակի բարձրացումը, կերային խոտաբույսերի բերքի ապահովվածությունը, սպառման համար անհրաժեշտ ներկրման քանակի նվազեցումը.

3) ցանքաշրջանառության կիրառմամբ գարնանացան մշակաբույսերի ցանքատարածությունների, համախառն բերքի ծավալների և գյուղատնտեսությամբ զբաղվող տնտեսավարող սուբյեկտների եկամուտների ավելացումը.

4) ագրոտեխնիկական միջոցառումների ժամանակին կատարումը, ցանքի նորմաների պահպանումը, ցանքաշրջանառության ապահովումը և բարձր ծլունակությամբ սերմերի օգտագործումը:

### **3. ԾՐԱԳՐԻ ԻՐԱԿԱՆԱՑՄԱՆ ՈՒՂՂՎԱԾ ՄԻՋՈՑԱՌՈՒՄՆԵՐԸ**

9. Ծրագրով նախատեսվում է իրականացնել հետևյալ միջոցառումները՝

1) **գարնանացան մշակաբույսերի սերմերի արժեքի սուբսիդավորում և լրավճարի տրամադրում.**

2) **բանջարաբոստանային մշակաբույսերի մշակությամբ զբաղվող անձանց անհատույց ֆինանսական միջոցների տրամադրում.**

3) **սիլոսի համար եգիպտացորենի և ծխախոտի մշակությունից ստացված բերքի իրացման դիմաց լրավճարի տրամադրում:**

10. Արցախի Հանրապետության գյուղատնտեսության նախարարությունը (այսուհետ՝ Նախարարություն) համակարգում և վերահսկում է Ծրագրով նախատեսված միջոցառումների իրականացման գործընթացը:

11. Տեղական ինքնակառավարման մարմինները (Ստեփանակերտ քաղաքում՝ Նախարարությունը), հիմք ընդունելով Ծրագրով սահմանված ժամկետները, ընդունում են գարնանացան և բանջարաբոստանային մշակաբույսերի մշակություն իրականացրած հողօգտագործողների հայտերը: Հայտերի հետ միաժամանակ տեղական ինքնակառավարման մարմիններ (Ստեփանակերտ քաղաքում՝ Նախարարություն) են ներկայացվում համայնքների վարչական սահմաններում գտնվող գյուղատնտեսական նշանակության տարածքների նկատմամբ սեփականության, և (կամ) վարձակալության, և (կամ) անհատույց օգտագործման իրավունքի պետական գրանցման վկայականների (այսուհետ՝ Վկայական) և անձնագրերի պատճենները: Տեղական ինքնակառավարման մարմիններն ընդհանրացնում և շրջանների

վարչակազմեր են ներկայացնում իրենց կողմից հաստատված տեղեկանք՝ նշելով հողօգտագործողի ազգանունը, անունը, հայրանունը, անձնագրային տվյալները, Վկայականների համարները և դրանց մշակության համար նախատեսված տարածքների մակերեսները՝ կցելով նաև հայտերի և Վկայականների պատճենները: Համայնքների վարչական սահմաններից դուրս գտնվող պետական սեփականություն համարվող գյուղատնտեսական նշանակության տարածքների վարձակալները փաստաթղթերը ներկայացնում են համապատասխան շրջանի վարչակազմ:

**12. Գարնանացան մշակաբույսերի սերմերի արժեքի սուբսիդավորում և լրավճարի տրամադրում՝**

1) Արցախի Հանրապետությունում սեփականության, և (կամ) վարձակալության, և (կամ) անհատույց օգտագործման իրավունքով հատկացված նվազագույնը 0,5 հեկտար (մեկ ամբողջական հողատարածքում) մակերեսով հողատարածքում գարնանացան մշակաբույսերից եգիպտացորենի, արևածաղկի, հնդկացորենի և կտավատի մշակությամբ զբաղվող հողօգտագործողներին տրամադրվում է՝ 1 հեկտարի դիմաց սահմանված համապատասխան քանակությամբ սերմ՝ սերմի արժեքի 80 տոկոսի չափով սուբսիդավորմամբ, կորնգանի և առվույտի մշակությամբ զբաղվող հողօգտագործողներին տրամադրվում է՝ 1 հեկտարի դիմաց սահմանված համապատասխան քանակությամբ սերմ՝ սերմի արժեքի 100 տոկոսի չափով սուբսիդավորմամբ, իսկ սեփական միջոցներով սերմերի ներմուծման դեպքում՝ սերմի արժեքի 80 տոկոսի չափով սուբսիդավորում՝ համաձայն N 1 աղյուսակի.

2) Նախարարությունը, Ստեփանակերտ քաղաքում սույն կետի 1-ին ենթակետում ընդգրկված հողօգտագործողների հայտերը, իսկ Արցախի Հանրապետության շրջանների վարչակազմերի կողմից սույն միջոցառման շրջանակներում հայտ ներկայացրած հողօգտագործողների վերաբերյալ տեղեկություններն ընդունում է մինչև յուրաքանչյուր տարվա ապրիլի 1-ը: Սեփական միջոցներով սերմերի ներմուծման դեպքում՝ հայտատուները հայտին պարտադիր կցում են սերմացուի հավաստագրի, ներմուծումը հավաստող փաստաթղթի, որակի փորձաքննության անցկացման արդյունքների մասին համապատասխան փաստաթղթի պատճենները:

3) Նախարարությունը հնգօրյա ժամկետում ընդհանրացնում և Արցախի Հանրապետության գյուղի և գյուղատնտեսության աջակցության հիմնադրամ (այսուհետ՝ Հիմնադրամ) է ներկայացնում սույն կետի 2-րդ ենթակետում նշված տեղեկությունները՝ սերմերի տրամադրման գործընթացն իրականացնելու նպատակով:

4) սույն միջոցառումից օգտվելու պարտադիր պայման է հանդիսանում համայնքի վարչական սահմաններից դուրս գտնվող պետական սեփականություն համարվող գյուղատնտեսական նշանակության տարածքների դեպքում՝ շրջանի վարչակազմի, համայնքի վարչական սահմաններում գտնվող տարածքների դեպքում՝ համայնքի ղեկավարի (ստորագրում է նաև շրջանի համապատասխան համայնքը սպասարկող գյուղատնտեսը), իսկ Ստեփանակերտ քաղաքում՝ Նախարարության կողմից տրամադրված՝ հողատարածքը ցանքսի պատրաստ լինելու վերաբերյալ տեղեկանքը: Եգիպտացորեն, արևածաղիկ և առվույտ

մշակաբույսերի դեպքում տեղեկանքը տրամադրվում է հաշվի առնելով ոռոգման ջրով ապահովված լինելու կամ, ելնելով նշված տարածքում արձանագրված օդերևութաբանական ցուցանիշներից, գարնանացան մշակաբույսերի մշակության համար պահանջվող կլիմայական գոտուն հողատարածքի համապատասխանության մասին.

5) Հիմնադրամը սերմերի տրամադրման գործընթացն իրականացնում է մինչև յուրաքանչյուր տարվա մայիսի 1-ը.

6) Նախարարությունը, մինչև յուրաքանչյուր տարվա հուլիսի 1-ն ընդունում, ընդհանրացնում և Հիմնադրամ է ներկայացնում Ստեփանակերտ քաղաքում ցանք կատարած հողօգտագործողների վերաբերյալ տեղեկությունները և Արցախի Հանրապետության շրջանների վարչակազմերի կողմից ներկայացված ցանք կատարած հողօգտագործողների վերաբերյալ ցանկը՝ նշելով ազգանունը, անունը, հայրանունը, անձնագրի տվյալները և ցանված տարածքի չափն՝ ըստ մշակաբույսերի.

7) Արցախի Հանրապետությունում սեփականության, և (կամ) վարձակալության, և (կամ) անհատույց օգտագործման իրավունքով հատկացված վարելահողերում նվազագույնը 0,5 հեկտար (մեկ ամբողջական հողատարածքում) մակերեսով հողատարածքում գարնանացան մշակաբույսերից ոսպի, ոլոռի և սիսեռի մշակությունից ստացված բերքը Հիմնադրամի պահեստներում իրացման դեպքում տրամադրվում է լրավճար՝ 1 կիլոգրամի դիմաց 30 ՀՀ դրամ գումարի չափով.

8) Հիմնադրամը յուրաքանչյուր տարվա սերմերի տրամադրման և բերքի մթերման գործընթացներն ավարտելուց հետո, տեղեկություններ է ներկայացնում Նախարարություն ոչ ուշ, քան մինչև յուրաքանչյուր տարվա նոյեմբերի 1-ը՝ նշելով սերմ ստացած և բերք հանձնած հողօգտագործողի ազգանունը, անունը, հայրանունը, անձնագրային տվյալները, ստացած սերմի և մթերված բերքի քանակը.

9) Նախարարությունը սույն կետի 8-րդ ենթակետում նշված տեղեկությունները ստանալուց հետո՝ տասնօրյա ժամկետում ընդհանրացնում և կազմակերպում է պետական աջակցության տրամադրման գործընթացը.

10) Հիմնադրամը համապատասխան ֆինանսական միջոցները ստանալուց հետո, հինգ աշխատանքային օրվա ընթացքում հողօգտագործողներին է վճարում բերքի իրացման դիմաց սահմանված լրավճարը:

### **13. Բանջարաբուստանային մշակաբույսերի մշակությամբ զբաղվող անձանց անհատույց ֆինանսական միջոցների տրամադրում՝**

1) Արցախի Հանրապետությունում սեփականության, և (կամ) վարձակալության, և (կամ) անհատույց օգտագործման իրավունքով հատկացված վարելահողերում բանջարաբուստանային մշակաբույսեր մշակելու համար հողօգտագործողներին անհատույց տրամադրվում է 1 հեկտարի դիմաց՝ 200 000 ՀՀ դրամ միանվագ գումար (պարտադիր պայմաններ են հանդիսանում մեկ ամբողջական հողատարածքի մակերեսը ոչ պակաս, քան 0,5 հեկտար լինելը և ոռոգովի դաշտի առկայությունը (բացառությամբ՝ կարտոֆիլի).

2) Նախարարությունը, սույն միջոցառման շրջանակներում Ստեփանակերտ քաղաքում բանջարաբուստանային մշակաբույսերի մշակությամբ զբաղվող հողօգտագործողների ցանկը,

իսկ Արցախի Հանրապետության շրջանների վարչակազմերի կողմից սույն միջոցառման շրջանակներում հայտ ներկայացրած հողօգտագործողների վերաբերյալ տեղեկությունները՝ համաձայն N 2 աղյուսակի, ընդունում է 2 փուլով՝ մինչև յուրաքանչյուր տարվա մայիսի 1-ը և օգոստոսի 1-ը.

3) սույն կետի 1-ին ենթակետով սահմանված անհատույց ֆինանսական միջոցների տրամադրման գործընթացն ապահովելու նպատակով Արցախի Հանրապետության գյուղատնտեսության նախարարի (այսուհետ՝ Նախարար) հրամանով ստեղծվում է հանձնաժողով.

4) հանձնաժողովը տեղեկությունների ներկայացման վերջնաժամկետից հետո, ուսումնասիրում է ներկայացված փաստաթղթերը, ստուգում դրանց ճշտությունը, տասնօրյա ժամկետում ընդհանրացնում և Հիմնադրամ է ներկայացնում դրական եզրակացություն ստացած՝ բանջարաբուստանային մշակաբույսերի մշակությամբ զբաղվող հողօգտագործողների ցանկը՝ նշելով ազգանունը, անունը, հայրանունը, անձնագրային տվյալները և տրամադրվող ֆինանսական միջոցների չափը՝ պետական աջակցության տրամադրման գործընթացն ապահովելու նպատակով.

5) սույն կետի 1-ին ենթակետով նախատեսված աջակցությունն անհատույց տրամադրվում է Հիմնադրամի միջոցով՝ հանձնաժողովի կողմից ներկայացված համապատասխան տեղեկությունների հիման վրա:

**14. Սիլոսի համար եգիպտացորենի և ծխախոտի մշակությունից ստացված բերքի իրացման դիմաց լրավճարի տրամադրում՝**

1) Արցախի Հանրապետությունում սեփականության և (կամ) վարձակալության և (կամ) անհատույց օգտագործման իրավունքով հատկացված վարելահողերում սիլոսի համար եգիպտացորենի մշակությունից ստացված բերքի իրացման դեպքում տրամադրվում է լրավճար՝ 1 կիլոգրամի դիմաց 10 ՀՀ դրամ գումարի չափով, իսկ ծխախոտից ստացված բերքի իրացման դեպքում՝ 1 կիլոգրամի դիմաց 20 ՀՀ դրամ գումարի չափով.

2) եգիպտացորենի սիլոսի դեպքում՝ լրավճարը տրամադրվում է Արցախի Հանրապետության տարածքում գործող անասնապահական ընկերություններին իրացված բերքի դիմաց, իսկ ծխախոտի դեպքում՝ ծխախոտի հումք մթերող ընկերություններին իրացված բերքի դիմաց.

3) սույն միջոցառման շրջանակներում իրացման գործընթացի նկատմամբ վերահսկողություն իրականացնելու նպատակով Նախարարի հրամանով ստեղծվում է հանձնաժողով.

4) մթերող ընկերությունները տեղեկություններ են ներկայացնում Նախարարություն սիլոսի համար եգիպտացորենի բերքի մթերման գործընթացն ավարտելուց հետո ոչ ուշ, քան մինչև յուրաքանչյուր տարվա հոկտեմբերի 1-ը, իսկ ծխախոտի դեպքում՝ ոչ ուշ, քան մինչև յուրաքանչյուր տարվա նոյեմբերի 30-ը՝ համաձայն N 3 աղյուսակի.

5) Նախարարությունը սույն կետի 4-րդ ենթակետում նշված տեղեկությունները ստանալուց հետո՝ տասնօրյա ժամկետում ընդհանրացնում և կազմակերպում է պետական աջակցության տրամադրման գործընթացը.



6) մթերող ընկերությունները համապատասխան ֆինանսական միջոցները ստանալուց հետո, հինգ աշխատանքային օրվա ընթացքում հողօգտագործողներին են վճարում սիլոսի համար եգիպտացորենի և ծխախոտի բերքի իրացման դիմաց սահմանված լրավճարը:

15. Սույն Ծրագրի ֆինանսավորումն իրականացվում է յուրաքանչյուր տարվա պետական բյուջեով այդ նպատակով նախատեսված միջոցներով:

#### **4.ԾՐԱԳՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ**

16. Սույն Ծրագրի իրականացումից ակնկալվող արդյունքներն են՝

1) գյուղատնտեսական մշակաբույսերի բերքատվության և ստացվող բերքի որակի բարձրացում,

2) մոլախոտային բուսականության, հիվանդությունների և վնասատուների դեմ պայքարի անհրաժեշտության նվազեցում:

17. Ծրագրի իրականացումից յուրաքանչյուր տարի նախատեսվում է՝

1) ցանել ավելի քան 5 000 հեկտար գարնանացան մշակաբույսեր,

2) ֆինանսական միջոցներ տրամադրել շուրջ 350 հեկտար բանջարաբոստանային մշակաբույսերի մշակության համար,

3) վերամշակող ընկերություններում հողօգտագործողներից մթերել ստացված ծխախոտի և եգիպտացորենի բերքի ամբողջ հումքը:

18. Գարնանացան և բանջարաբոստանային մշակաբույսերը հումք են հանդիսանում վերամշակող ընկերությունների համար: Յուրաքանչյուր մշակաբույսերի վերամշակումից ստացված ձեթը, ընդեղեն մշակաբույսերից՝ հատիկը, հնդկացորենից՝ հնդկաձավարը և բանջարաբոստանային մշակաբույսերից՝ պահածոները հանդիսանում են առաջին անհրաժեշտության պարենամթերք և ունեն կենսական նշանակություն մարդու օրգանիզմի նորմալ գործունեության համար: Կերային խոտաբույսերից ստացված անասնակերը կնպաստի անասնաբուծության զարգացմանը:

Աղյուսակ N 1

Գարնանացան մշակաբույսերի սերմի արժեքի սուբսիդավորման, աջակցության չափի և տրամադրվող լրավճարի մասին

Հ/Հ	Մշակաբույսը	Ցանքի նորման (կգ/հա)	Սերմացուի մեկ կիլոգրամի դիմաց տրամադրվող սուբսիդավորման չափը ոչ ավելի, քան (ՀՀ դրամ)	Մթերված արտադրանքի մեկ կիլոգրամի դիմաց տրամադրվող լրավճար (ՀՀ դրամ)
1	Եգիպտացորեն (հատիկ)	20	4 250	10
	Եգիպտացորեն (սիլոս)	25		
2	հնդկացորեն	100	650	
3	արևածաղիկ	4	3 800	
4	կտավատ	60	650	
5	առվույտ	20	3100	
6	կորնզան	120	800	
7	ծխախոտ			20

Աղյուսակ N 2

Արցախի Հանրապետությունում բանջարաբոստանային մշակաբույսերի մշակությամբ զբաղվող հողօգտագործողների վերաբերյալ տեղեկություններ

Հ/Հ	Համայնք	Ազգանուն, անուն, հայրանուն	Անձնագրային տվյալները	Մշակված տարածքը (հեկտար)
1				
2				
3				
...				
<b>Ընդամենը՝ շրջանում</b>				

Արցախի Հանրապետությունում սիլոսի համար եզիպտացորենի և/կամ ծխախոտի մշակությունից ստացված բերք մթերած հողօգտագործողների վերաբերյալ տեղեկություններ

Հ/Հ	Ազգանուն, անուն, հայրանուն	Անձնագրային տվյալները	Մթերած բերք (կիլոգրամ)
1			
2			
3			
...			
Ընդամենը՝			

ԱՐՑԱՒԻ ՀԱՆՐԱՊԵՏՈՒԹՅԱՆ ՆԱԽԱԳԱՀԻ  
ԱՇԽԱՏԱԿԱԶՄԻ ԿԱՌԱՎԱՐՈՒԹՅԱՆ ԳՈՐԾԵՐԻ  
ԿԱՌԱՎԱՐՉՈՒԹՅԱՆ ՊԵՏ

Ա. ԼԱԶԱՐՅԱՆ